

阿文成公年譜

阿文成公年譜卷十

受業

王昶勘定

第三孫那彥成恭纂

盧蔭溥增脩

乾隆三十八年

十月初四日

公偕色布騰巴爾珠爾奏言伏查官兵現駐日隆達木巴宗計至明郭宗美諾一百餘里此內山勢均爲極險節節皆堪固守去年攻打一年猶必俟南路官兵已抵賊巢始能會合若以現有兵力一

路進攻賊番踞守險要又必久淹時日是以收復  
小金川事宜必須分路進攻使賊無從抵禦方能  
迅速奏功但路多則需兵更多今新到滿漢各兵  
不及六千而日隆舊存之兵軍裝軍械俱未齊全  
卽如四川本省軍裝猶有未到而黔兵所解衣履  
亦因川省轉遞遲滯未抵軍營此時積雪滿山若  
遽督率進攻斷難望其得力臣身膺重寄如有機  
會可乘豈不思及早奏功無如熟審情形通盤籌  
計自非俟吉林兵到不足以供分撥至相近賊境  
之士司如巴旺布拉克底前此在當噶爾拉山梁

金川投稟該土司頭人等深知臣無將就了事之意所以殲戮小金川賊番甚衆而金川讎恨之深亦惟兩土司尤甚茲據從金川脫出之通事賡噶供稱賊酋兄弟最恨巴旺布拉克底兩土司而草布什咱次之現合喇嘛咒詛該土司等語兩土司苟非實心攻打眞與賊酋決絕何至銜怨如此之深但今除南路外餘如瓦寺木坪地方密邇內地該土司尙爲出力現在派兵來營隨剿而三雜谷土兵則自木果木失事之後旋俱散去至今尙未到營臣卽分繕檄文詳悉諄諭各土司伊等旣可

永除後患自當奮力協攻至谷噶一處

臣

等前詢

之土目據稱道路不甚艱難若由山梁壓下可抵  
勒烏圍今賡噶復稱谷噶有夾溝一道險仄異常  
兼以卡防嚴密惟從凱立葉下攻易於得利所見  
又有不同

臣

等當悉心再訪務期必得妥捷之路

公又偕色布騰巴爾珠爾奏言金川逆酋罪大惡  
極前此欲令其獻出僧格桑並藉以誘擒索諾木  
原屬權宜之計且或冀畧省官兵打仗之力而於  
此兵力未齊之先稍爲安頓使其禦備稍疎易於  
采入乃欲懈賊而實不敢自懈此時賊酋雖將僧

格桑縛獻臣等斷不肯萌歇手之心至於金川能打仗番衆不過數千有何力量特以其地萬山環抱險阻異常正如蛇鼠憑其窟穴因得稍延殘喘若各路果能鼓勵官兵相度形勢俟有可乘卽行攻進斷無不能竣事臣阿桂前奏所謂非無把握者以此均奏入

諭曰據阿桂等奏稱此時賊酋雖將僧格桑縛獻斷不肯萌歇手之心等語縛獻僧格桑一說或將來官兵進攻得勝直壓噶拉依勒烏圍等處賊酋勢處窘迫始將僧格桑獻出以求免禍尙不可知若就現在情形而論則

斷無其事阿桂當切齒賊情狡惡勿稍游移方爲有識  
至溫福木果木軍營所失米一萬六七千餘石銀五萬  
餘兩火藥七萬餘斤俱爲逆會所得必已搬回金川索  
諾木自應據爲已有卽或分給衆人豈能各遂其欲此  
亦如內地賊犯分贓不均必至自相爭競其中或滋覺  
隙亦未可知若果有此機會卽可乘勢設法離間藉以  
得手然此只能伺察其變隨機妥辦並非預有把握也  
此事正辦總當先行收復小金川一經平定卽分路進  
剿金川其進兵路徑據奏從凱立葉下攻易於得利等  
語閱圖內凱立葉在兩金川之間與大板昭相近若果

可另爲一路亦足令賊人照顧不暇阿桂卽當密訪確實妥酌而行若可爲進兵正路阿桂當由此而進若不過爲進剿牽制之一路卽將應派何處官兵若干及應派何人帶兵攻剿之處均行奏聞又賡囑所供遊擊陳聖矩因被賊圍營中無水自行放火焚燒伊父子及兵丁等俱行焚死等語甚爲可憫著阿桂再行查明奏請交部議卹至阿桂在營惟當努力收復小金川並上緊籌畫進剿金川之局看來小金川之事尙屬易辦若金川則一時原難把握但現調滿漢官兵聲勢甚大賊自難於支禦縱使稍稽時日賊亦不能經久相持况軍需



費用雖多而現在再撥二三十萬庫藏亦尙充盈朕意  
惟在勦滅兩金川永除後患斷不靳惜多費阿桂等務  
須深體朕意努力成功以膺茂賞

初五日

諭曰阿桂等現在收復小金川看來尙屬易辦其地雖有  
金川賊番幫同守把但以主客情形而論金川之人在  
本處恃險抵禦習其地利便於準備官兵攻打自不免  
費力若金川賊衆出至小金川地方則彼亦轉而爲客  
離其地險失其所長斷不能如在金川之隨宜布置而  
衆官兵自前歲冬底攻克美諾以後經行駐守半年有

餘其間路徑皆所諳悉可以因地制宜熟籌克敵之法  
我兵分路進剿不但易於制勝迅望奏功卽金川賊衆  
在彼幫守者亦可藉此多爲殲戮並莎羅奔岡達克及  
其大頭人等若在美諾皆可乘勝剿擒實爲最好機會  
阿桂等惟當努力爲之至於進剿金川自以預定路數  
爲要功噶爾拉當噶爾拉兩處雖云正路但其地業經  
進攻半年賊酋防備已久今見官兵奮勇再進必料仍  
由此路進攻自復照前預備阿桂轉可毋庸親往此兩  
處只須擇其中較要者令明亮等統兵前往或可相機  
攻進餘則另行派員帶兵牽掣若昨奏凱立業之外更

有別路阿桂亦當悉心酌核總擇各路中最緊要易進者阿桂親自督兵前進其餘則以次權其輕重酌定何路派何人牽制一面辦理一面奏聞

十一日

公奏言

臣

接准豐昇額來札稱綽斯甲布土司工

噶諾爾布身故其嫡出次子雍中旺爾結該土司

在日已定承襲等語

臣

思此時不如先爲明白曉

諭以安其心

臣

酌派叅將馬應詔前往唁問金令

偕知府盛英傳諭綽爾甲木燦雍中旺爾結等以

汝父工噶諾爾布雖係金川之婿而恭順出力始

終如一汝等欲保守祖父之地方百姓長爲土司  
必先思繼汝父之志金川雖係汝等親戚但如僧  
格桑非獨娶於金川又係一家兄弟今金川將僧  
格桑拘囚在科思果木有事則用以號召番人得  
志以後仍復帶歸拘禁此等狡惡之人雖屬姻親  
有何可恃至如布拉克底土司亦與金川兩世親  
戚伊等深知金川兇惡欲爲自己永除後患實心  
攻打絕無瞻徇是以

大皇帝深爲嘉悅屢次加

恩初無見疑之處現在大兵數十萬來赴軍營金川勢在

必滅汝等兄弟實心出力雖娶於金川金無妨碍  
如此曉諭自可使之安帖其綽爾甲木燦聞向在  
宜喜等處帶領土兵尙爲奮勉而頭人松乃與金  
川讎恨甚深若引之使近於攻勦之處可冀得力  
臣將行知豐昇額等酌量妥辦奏入報

聞

公又偕色布騰巴爾珠爾奏言查索諾木窮兇極  
狡於滋擾各處之時挾僧格桑以號召番人及其  
得志又據僧格桑以歸仍視爲孤豚腐鼠此時賊  
會所以不卽縛獻僧格桑者尙欲以繫屬小金川

衆番之心希冀大兵進剿可驅以先撓鋒刃若掃  
除美諾之後賊酋懾我軍威亟思解免則視僧格  
桑又成棄物何惜縛獻軍門其用心狡惡實爲覆  
載所不容但賊酋既用僧格桑以煽動小金川番  
衆之心仍拘僧格桑以據小金川之地番衆豈能  
不生怨望誠如

聖諭其不留僧格桑在美諾賊酋自以爲得算不知已失  
小金川衆心昨詢脫出之瓦寺番人那木喀據稱  
莎羅奔在美諾時彭魯爾各寨百姓前往送酒俱  
稱

天朝恩典甚深打仗俱有鹽菜口糧衆等因想念舊土司  
纔行此事今可將我土司僧格桑送回莎羅奔言  
天朝爲因僧格桑不肯撤兵俟大兵退過巴朗拉時纔可  
令其回來等語此雖賊酋駕詞籠絡而小金川番  
衆豈必盡受其愚弄且據那木喀又供賊酋等役  
使小金川人備加凌虐衆番回想

天朝撫馭之恩自必心生怨悔將來設法招致其計自屬  
易行臣等遵

旨傳喚穆塔爾前來密加獎賞該番極爲欣感據稱此一  
帶南北兩山形勢向來熟悉再密遣人前往偵探

道路何處易於進攻何處可以繞出并賊人多少  
查訊明確回報辦理屆期仍探明我等親戚相好  
現在何處相機約令內應等語臣等查僧格桑久  
爲金川脅制卽其頭人七圖安都爾等亦已聽索  
諾木任用未必轉能圖剪金川如小金川番人仍  
復來投則收復美諾等處已爲事半功倍至莎羅  
奔岡達克前據賊番叫喚稱該賊前來美諾嗣據  
賊稟內又有回金川念經之語而那木喀亦供已  
從南路回去臣等揣測賊情岡達克此來不過將  
小金川番衆飾詞哄誘且令七圖安都爾帶領力



爲堵禦而自回金川爲死守巢穴之計但賊番行踪詭秘來往無常將來進兵之後賊酋兄弟或又潛來美諾協力助守亦未可知臣等於收復美諾時務期踴探明確分派得力將備繞截其竄逸之路毋論賊酋兄弟及大頭人等總惟多獲一賊人卽早除一逆黨斷不敢稍有疏懈奏入

諭曰阿桂等奏那木喀各供小金川番衆心生怨悔招致之計自屬易行等語此乃情理必然之事小金川番衆旣與金川離心迎機招誘應必樂從看來收復小金川之事較攻勦金川原屬易辦至其番衆雖係被僧格桑

誘脅究屬已降復叛即使仍然降順亦不可復畱或臨期酌量情罪重輕分別殲誅移置但美諾初定之時不可卽爲辦理必須俟剿滅金川後方可一并籌辦以爲善後事宜惟是將軍等既得美諾等處必須加意嚴密防備勿再使僧格桑潛出煽誘斷不可以小金川又經收復稍涉大意致蹈前此疏虞覆轍阿桂等均宜籌畫妥善切實嚴防後路則進剿金川方無後患

公又偕色布騰巴爾珠爾奏言查梭磨從噶克卓克采土兵於木果木失事時俱行散去臣阿桂自赴西路卽檄飭該土司等仍派兵助剿並調其頭

人來營茲於九月二十三日梭磨土婦卓爾瑪遣  
頭人沙克嘉綳從噶克土司納木扎爾遣頭人岡  
多爾濟卓克采土司甲噶爾布木遣頭人阿塔爾  
均至日隆軍營請安臣等諭以此時數十萬大兵  
齊到定將作惡土司滅淨根株爾三家應派二千  
兵隨營進剿並嚴飭各頭人土兵倍加出力該頭  
人等均稱我等土司現已派出兵丁我等回去卽  
遣陸續赴營查三雜谷土司境地均與兩金川相  
接一有舉動賊會易於知覺今三雜谷土兵須俟  
頭人回日始行進發雖未免於稍遲但現今大兵

漸集本不待屯土之兵卽當進剿而金川賊人若  
知此時始調土兵必以爲大兵進討尙需時日其  
意或不無稍懈臣等一俟吉林兵到迅速進攻於  
事轉爲有益至三雜谷地方詳詢該頭人等並無  
妥捷進兵道路與豐昇額等查訛大畧相同奏入  
報

聞

二十日

公偕色布騰巴爾珠爾奏言臣等現在剋日進兵  
一面收復美諾一面接剿金川此時兵力愈盛分

路愈多則奏功愈速若索倫兵丁全到尤爲得濟  
但<sub>臣</sub>等至此業經兩月心急如焚不可再有遲待  
總俟吉林兵到即可分路進攻查吉林第三起於  
十月初一日始自成都進發約計五起當於十月  
末旬全數到營至南路亦須新調官兵始資分撥  
而南路程站較長是以<sub>臣</sub>等於吉林兵內先將在  
前之頭二起撥赴南路據文綬咨稱此項兵丁於  
九月二十八日及十月初一日始從省起程亦約  
計於十月杪全抵南路至是時西路所需軍裝軍  
械等物大概均可齊全<sub>臣</sub>等現將月盡月初約可

進攻之處先行密札知照豐昇額及明亮等從容  
預備一俟定期卽速寄知務期同日進攻使賊會  
首尾不能相顧以便迅速集事至各路兵數核計  
南路滿漢官兵共有一萬三千餘名今又益以新  
調官兵四千五百名又有屯練土兵共計已及二  
萬其綽斯甲布一路漢土官兵本有一萬四五千  
名卽節次攻勦不無傷損而合之近日調往三千  
名兵數亦應與從前相仿至臣等西路所有新舊  
滿漢屯土各兵除索倫一千五百名未到外共計  
二萬三千數百名是三路官兵併計六萬有餘再

加以草布什咱丹壩分撥防守及後路防護糧臺之兵爲數幾至七萬聲勢已盛雖西路內南北兩山均須酌派大員繞路進攻其北山之別斯滿一路擬派兵八千名南山之本布爾桑岡擬派兵九千名臣阿桂中路俟索倫及土兵全到可得六七千名路數較多則進取自可較易是以湖廣預備之三千兵恐其調赴軍營緩不濟急經臣奏請暫停咨調總於收復美諾進搗金川時再遵

旨調來分撥應用奏入

諭曰據阿桂奏稱收復美諾之事約於月盡月初可以進

兵但阿桂等各路滿漢兵丁皆爲進剿之用而後路更無餘兵防守賊酋狡惡多端且兩金川相通路徑叢雜難保其不潛出邀截我兵之後此事甚有關係不可不防前據明亮等奏訊據從金川脫出之小金川番人阿嘉供詞有聞得金川賊酋欲前往巴旺布拉克底兩處報讎等語此兩處爲翁古爾壘切近後路已諭明亮等加意防範又昨據豐昇額等奏訊據來投金川之番人班第斯嘉布供詞有聞得金川土司頭人商量派兵抬礮到達爾圖山梁要搶官兵營卡賊酋若果注意在達爾圖滋擾斷不肯預洩其事使我兵得聞此必逆酋爲



指東擊西之計陽稱往達爾圖而潛赴別斯滿等處抄截必須嚴密防守曾經諭知阿桂等一體畱心至官兵進剿時賊衆若迎面而來則正利其出而失險我兵得以奮勇剿殲若彼潛匿我後則後路斷不可無兵控制前已諭調湖廣兵三千於進剿金川時畱防後路並諭令富勒渾王進泰在彼帶兵駐守續據陳輝祖等奏稱各兵俱在宜昌暫駐赴川頗爲便捷現在攻復小金川巴朗拉一帶後路卽關緊要莫若此時卽調赴軍營於防範更爲得力現諭令陳輝祖派兵二千前赴日隆聽阿桂酌量應防要隘派撥防駐其一千派赴綽斯甲布

交鄂寶酌派駐守著傳諭阿桂卽行籌酌妥協一面辦理一面奏聞

公又奏言 臣 欽奉

諭旨查詢金川等處地圖竊查各土地地名最爲繁瑣一山而各嶺異名一嶺而各碉寨又異名必須攻至一處始能盡知各該處山峯碉寨之名從前所進地圖原不能全備今將兩金川舊圖所有地名及曾經攻剿於摺內奏明者均行添入以便查核至小金川地方以底木達布郎郭宗山形而論則小金川在金川之東南以美諾山形而論則小金川

在金川之西南該處一帶形勢灣環而衆山迴合之中路徑橫斜繚曲者甚多隨步換形卽一二十里之內已無定準前此軍營所進各圖只以大概方向爲憑是以未能悉合今臣令賡噶穆塔爾等當面指畫再三詳詢據云兩金川地方形勢實係如此再從前土弁土兵皆未有稱谷噶一路可以進兵者所以圖內未經列入昨土兵雖言谷噶道路不甚艱難而賡噶又言該處山勢陡險坡礪甚大惟從凱立葉作固頂進攻易於得利此次繪圖已將谷噶凱立葉均行載入再查小金川之河東

南一支發源於把朗拉由資哩鄂克什而西其東北一支發源沙木角拉拜孟拉兩山之間由底木達布朗郭宗西南流至明郭宗會合又西流經美諾達烏至章谷等處始與金川之河會合其金川之河發源於丹壩境外西北地方由綽斯甲布竹孜官寨一帶流入金川經勒烏圍噶拉依官寨之西南又經巴旺布拉克底及草布什咱境至明正章谷之甲木楚河而合於小金川之河下游歸入打箭爐河兩河皆係經流千山萬壑所匯波濤洶湧斷無可決可塞之法奏入報

聞

二十六日

公偕色布騰巴爾珠爾奏言前臣等具奏月底俟

吉林兵到卽札寄豐昇額明亮等約期進兵今副都統福珠禮領吉林第三隊兵於本月二十二日已抵日隆其餘四隊官兵二十三、四等日可以陸續到齊而派往南路之頭二隊吉林兵亦計日可到臣等公同商議自二十六日起派撥官兵前進定於二十九日相機剿擊金先札知豐昇額明亮等剋日進攻再查滿洲索倫兵丁現自綿州前赴

成都分四站行走臣等移咨文綬飭領兵員弁將四站改爲兩站以期迅至軍營奏入

上嘉之

公又奏言查軍營米糧火藥等項固不可稍缺亦無庸多積轉致滋累臣前在南路曾於四五月間飭令按察使李世傑暫停輓運今蒙

皇上訓示精詳所有糧儲火藥銀兩賞需等項俟與該督等將每月供支應用之數酌量大概令其陸續運營其餘應於何處存貯悉心核定再行具奏至於分防卡隘之法惟擇扼要地方派駐多兵以供控

制賊番偶有伺間前來痛加截殺賊卽不敢妄生

窺伺

臣

前在當噶爾拉山梁皆如此辦理今蒙

聖諭益當引昔嶺軍營爲前車之鑒至現在踴探進剿金  
川路徑必與各處聲氣相通而後路無虞方爲妥  
善所以不敢輕率定議奏入

諭曰阿桂所奏攻剿金川進兵道路其凱立葉一處亦屬  
未定之詞今已進兵收復小金川自可計日成功卽須  
分路進剿金川其路徑不可不及早籌定著阿桂卽速  
畱心探訪核實密爲酌辦仍卽具摺奏聞

十一月初四日

公偕色布騰巴爾珠爾奏言查賊會索諾木本屬  
闇弱童頑一切奸謀多係伊兄莎羅奔岡達克及  
丹巴沃雜爾爲之主使而此時僧格桑如孤豚腐  
鼠已成無用之人誠如

聖諭若能擒此二人旣以剪賊酋羽翼且可寒賊人之膽

臣等剋日進兵將抵美諾時一面攻打一面設伏  
堵截務期悉行弋獲至賊人所築礮卡多在隄坎  
山崖之上可以兩三面圍攻者本少臣阿桂向來  
偶遇有覓路繞攻之處俱派出矯健弁員帶領土  
兵前往今旣有吉林索倫勁旅履險登山皆能奮



勇如遇賊衆負隅可以遠越卽派索倫等兵與土  
兵同往金派普爾普成果等統率進攻自更爲得  
力查索倫兵二千名臣等已奏明於前起內酌派  
五百名令赴南路今遵

旨又行知副都統倭昇額署川督臣文綬將未起三百名  
派赴綽斯甲布軍營均令由京派出原領隊之侍  
衛等帶往其餘應赴西路之索倫兵一千二百名  
現在陸續可抵成都約於十一月初旬內全數到  
營奏入

上嘉之

公又偕色布騰巴爾珠爾奏言臣等密札豐昇額明亮等已定期於本月二十九日分路進兵收復但臣等西路官兵尤爲克復小金川正路必須計出萬全始可一舉成功今查探資哩河北之色布色爾美美卡河南之阿喀木雅鄂克什路頂宗等處俱係我兵進攻要口現有賊番佔據若僅恃兵力進攻道路窄險一時難於得手須從南北山梁超越前往斷賊歸路前後夾攻方爲有益臣等詳加商議若從達木巴宗超越南山本布爾桑岡奪佔貢噶山梁其間路途迂遠山險籌深賊番知覺

恐有攔截之虞至北山之色布色爾地方雖亦有賊番礮卡且山勢甚高路途較遠但其地稍寬箐林亦少查達木巴宗之北有路可通斯達克拉阿噶爾布里碩藏噶爾莫如派兵潛往不帶帳房不舉烟火突然掩擊若能攻據此三處一路由別斯滿攻底木達布朗郭宗一路攻取兜烏可以夾攻鄂克什明郭宗從此順攻帛噶爾角克山梁卽可直抵美諾至美美卡一處更爲賊會要地從山溝而北可以通別斯滿而西逼鄂克什官寨且與南山之木攔壩遙相對峙山形險絕難以力攻

臣擬

是時在資哩北山下乘其不備派兵直搶美美卡  
或於美美卡東邊之瑪色爾渠佔地駐扎則前往  
碩藏噶爾之兵下至別斯滿時官兵聯絡接應色  
布色爾等處之賊自不能久據臣等商議既定卽  
派兵二千餘名駐扎色布色爾對面山梁以防賊  
番斷我後路其阿噶爾布里等處令海蘭察常青  
曾爾曾保寧伊達禮常保任等帶兵八千餘名分  
派前往又派兵三千名令富興烏什哈達特成額  
等視中路官兵進攻資哩時卽帶兵自資哩北山  
下直取美美卡等處又派兵四千餘名令成德等

帶領奪佔資哩南山臣色布騰巴爾珠爾臣阿桂  
帶同領隊大臣金兵五千餘名從中路攻勦資哩  
金爲各路接應西路如此分進而南路與綽斯甲  
布兩路之兵同時進發以分金川賊酋之勢賊番  
卽多詭譎亦斷不能分頭抵禦

公又奏言查綽斯甲布頭人松乃其父爲金川所  
殺臣在南路時據知府盛英守備張芝元及宋元  
俊皆有此語去年八月間霍爾章谷土司因挾綽  
斯甲布搶其烏拉之嫌曾將松乃拘畱臣是時正  
辦綽斯甲布一路進兵因飭將弁等曉諭各土司

將松乃放出令往宜喜軍營帶領土兵以資其力  
昨豐昇額等來札稱松乃之兄從前亦爲金川所  
殺是其讎恨甚深實爲有據松乃現在帶兵攻剿  
荷蒙

皇上天恩賞給翎枝并賞銀兩自必更當踴躍自効至此  
次金川賊會實因誘脅降番各反其地是以後路  
皆多梗阻將來收復美諾進剿金川其美諾以南  
各寨前已洗剿殆盡而美諾東北一帶小金川寨  
落尚多處處嚴防不獨多分兵力恐後有照料不  
到之處似難俟剿滅金川後一併籌辦伏思此等

已降復叛之番原應盡加誅戮俾無噍類但恐金川賊衆益以堅其死守之心又不得不權宜辦理然其大寨堅碣斷不可畱而附近金川人戶亦當別籌移置所遺碣寨並應概行拆毀使賊無勾結之端憑藉之地則後路方可無虞均奏入

諭曰阿桂等奏分路派兵剿復小金川一摺所辦甚好佇盼捷音此次添有滿洲勁旅聲勢甚盛而阿桂等派撥帶兵之處亦甚合宜看來收復美諾自屬易事况小金川番衆與金川離心之處傳聞已屢乃情理所必然今見大兵進攻且隨路遣人招致其望風來降亦可意料

而得惟是此等降番皆係曾經叛逆之犯於法本無可  
恕但處之過嚴不但小金川諸番聞而生畏前途未必  
復肯來降且金川賊衆聞之更不敢前來投順益以堅  
其死守之心自不可不權宜辦理第阿桂所稱其大寨  
堅礮斷不可畱而附近金川人戶亦當別籌移置所遺  
礮寨亦當並行拆毀使賊無憑藉之地等語所見固是  
但拆毀礮寨殊非易事旣恐輕分兵力且不免稍稽時  
日卽別籌移置亦非其願况前此宜喜軍營以弁兵七  
八人管解賡噶一人尙致脫逃今小金川番衆如果來  
降數必不少當得弁兵幾何方敷押解設或中途又致



竄逃更復成何事體朕意莫若且不動聲色照常安插  
卽有必須正法者總俟兩金川平定後再分別籌辦庶  
爲萬安然情形隨時不同惟在阿桂等審度機宜妥爲  
辦理或有可疑之地可疑之人不得不辦者又不可拘  
泥此旨也且從前賊衆潛出美卧溝至底木達等處招  
誘降番復叛滋擾木果木軍營之事皆由溫福妄自尊  
大不聽人言不恤士卒又一切全無料理致令衆心生  
怨而劉秉恬董天弼於防閑後路又復貽悞致賊番得  
以肆其猖獗今各路將軍等諸事妥爲調度賊酋自無  
隙可乘而後路諭令富勒渾王進泰統兵駐守以劉秉

恬董天弼爲戒加意防範自不致稍有疏虞今進兵已  
五六日深爲盼望一有喜音卽隨時迅速奏聞

十二日

公偕色布騰巴爾珠爾奏言

臣等於十月二十七

日子刻派海蘭察常青帶兵八千餘名由達木巴  
宗北山取道前攻斯達克拉阿噶爾布里碩藏噶  
爾三處以壓別斯滿至北山一路派富興烏什喀  
達等帶兵三千餘名前往攻搶木拉斯底魯爾瑪  
美美卡等處其南山一路派成德等帶兵四千餘  
名從上繞進壓取阿喀木雅此兩路官兵均於三

十九日子刻潛進至臣等中路內復分兩路派額森特等帶兵一千名由資哩之北山根進攻海祿納木扎等帶兵一千名由資哩之南山下進攻亦均於二十九日子刻起程潛密遡進臣阿桂色布騰巴爾珠爾積福福康安福珠里帶兵分頭接應查資哩北山下有橋一座爲兵丁往來要路賊番築卡拒守寅刻額森特督兵進攻賊番放鎗抵禦將近橋卡賊益盡力拒守我兵奮勇衝撲賊不能支四散奔潰官兵追殺過半即將橋梁奪佔其北山下路富興等趁額森特奪橋之際帶兵取道上

山分佔木拉斯底魯爾瑪等處而海祿亦帶兵由南山往攻阿喀木雅東溝之碉額森特既得橋座卽帶兵前往合攻而是時成德繞從南山而下亦壓至阿喀木雅東溝三路官兵會合奮攻該處碉座本屬堅大又在山厓之上極爲陡險賊番拒守甚力官兵不顧鎗石進撲數次賊於碉內鎗石交下攻至亥刻賊見勢難抵禦乘夜出碉逃竄官兵追趕下坡鎗箭齊發殲斃頗多是日富興烏什喀達等帶兵上至魯爾瑪地方督率侍衛將弁等分佔美美卡東瑪色爾渠等處均經攻克亦有殺獲

其海蘭察等北山之兵於二十九日申酉間分爲三路進攻將斯達克拉阿噶爾布里碩藏噶爾山梁同時攻克佔據而色布色爾之賊見勢已孤望風驚潰該處係在別斯滿之巔下壓極爲得勢據報現在迅速籌辦是夜額森特海祿等隊內官兵因鏖戰一日夜暫令歇息至三十日五更進攻阿喀木雅山上大礮官兵四面奮撲攀附而上賊番駭竄旋將山梁一帶礮卡全行攻克額森特等乘勝直取木攔壩賊俱奔潰隨督兵直攻鄂克什官寨賊見我兵勇銳異常一面放鎗迎敵一面四散

竄逃殺賊甚多掣獲活口二名派兵將官寨據住  
其各處奔竄賊番均遁入路頂宗聚守臣等統率  
官兵乘此銳氣現在督合力攻以期卽克臣等查  
此一路內如阿喀木雅美美卡木攔壩形勢均爲  
險絕上年攻打至五六月之久始行克取今此數  
處均有賊番據守且已早爲預備乃於兩日之間  
盡行克復此皆仰荷

皇上調撥滿洲勁旅暨各省精兵

指示機宜分頭並舉俾賊酋左支右絀首尾不顧是以迅  
速摧破此次各隊官兵不獨滿兵奮勇絕倫卽新

到緣營官兵均倍常出力而舊兵亦奮勉爭先

臣

等仰仗

威福自可乘勝直入奏入

諭曰阿桂明亮等奏西南兩路官兵均於十月二十七八九等日分路進剿西路已盡克資哩南北山梁美美卡木攔壩並收復鄂克什官寨南路已克得布里喇嘛寺得里兩面山梁及日寨策爾丹色木現俱鼓勵官兵乘勝前進等語收復小金川其勢較易朕已久經料及但此次甫經進兵數日之間卽速得賊酋險要礮卡殺賊一甚眾覽奏深爲嘉悅將軍參贊調度董率有方西路領

隊大臣額森特於攻勦資哩木攔壩時較衆倍加奮勉  
南路之領隊大臣奎林攻克得里賊礮亦甚勇銳均著  
交部議叙其在事出力之將領弁兵著阿桂明亮等查  
明咨部一併議叙其中有勇勉超羣者查確專摺奏聞  
候朕量加優獎

又

諭曰據阿桂明亮等奏到兩路同時進勦連克賊會礮卡  
阿桂已抵路頂宗明亮已過策爾丹色木距美諾均不  
遠自可卽望捷音此次進兵以來兩日之間連得賊會  
險要礮卡如摧枯拉朽固由添派滿洲勁旅勇往直前



綠營兵亦皆效法知勉是以所向克捷但究覺得之太  
易恐賊會暗藏詭計或讓我兵直進在後抄截不可不  
防在官兵現俱乘勝而進自當鼓其銳氣使益奮勇成  
功所謂兵貴先聲亦董勸將士之道至帶兵之將軍參  
贊領隊等遇事當加倍慎重不可因連次得勝稍存得  
意自滿之心滿招損謙受益古訓昭垂將軍等各宜深  
體此意凡進兵後路加意嚴防慎之又慎方爲妥善就  
現在情形而論官兵乘勝深入實有席卷之勢其於克  
復美諾布朗郭宗等處自非難事卽剋日集勦亦不足  
言喜惟將莎羅奔岡達克丹巴沃雜爾及七圖安都爾

等一併設法擒獲朕方喜慰蓋岡達克丹巴沃雜爾乃  
索諾木所恃主謀得力之人而七圖安都爾向爲僧格  
桑管事一切狡詭可惡之處皆彼黨助此三人斷不可  
輕宥卽或岡達克丹巴沃雜爾二人未必果在美諾或  
聞官兵勢盛仍復竄回皆不可定而七圖安都爾爲小  
金川舊賊目自必在美諾等處率衆拒守阿桂明亮等  
均當一體畱心若能將賊酋賊目等拏獲卽選派妥幹  
之員解京嚴審辦理所有將軍等此次統兵調度有方  
深爲嘉慰阿桂明亮著各賞大荷包一對小荷包四箇  
色布騰巴爾珠爾富德各賞大荷包一對小荷包三箇

海蘭察常青奎林各賞小荷包三箇曾爾魯烏什哈達額森特特成額海祿富興三寶舒景安各賞小荷包二箇以示獎勵至豐昇額等一路雖係牽綴之兵其進兵後情形若何亦著迅卽具奏

恭錄

御製詩

將軍阿桂副將軍明亮奏報攻獲賊礮戰勝各情形

詩以誌事

討罪復讎重整師羽林黑水簡熊羆到齊甫報發征肅自蜀欣看至捷旗

征剿兩金川以來僅調派各省綠旗兵而滿洲勁旅於選定之後因溫福阿桂奏止

送未發往以致事不足恃茲整兵再進宜籌萬全因簡健銳火器兩營兵二千金吉林黑龍江兵各二千按隊遞進於十月中俱已入川昨阿桂奏派兵八路並進於十月二十七日起程金與明亮相訂均於二十九日同時進兵收復小金川而兩將軍隨馳函西路兩胡據鄂什路統兵又報捷皆十一月朔日所奏也西路兩胡據鄂什路統兵又派海蘭察富興成德積福成果等同侍衛章京其為五路領兵進剿今奏二十九日子時諸軍進發阿桂色布騰巴爾珠爾福康安福珠里分路策應是日即攻克資哩木拉斯底會爾瑪阿喀木雅東溝及斯達克拉阿喀爾布碩藏噶爾山梁色希色克小美美卡東瑪色不渠十處礮卡三十日攻克阿喀木雅山上大礮直取木攔壩乘勢攻得鄂克什官寨賊人遁入路頂宗官兵乘銳難禦所至奔竄我兵追擊賊眾金悉力拒守見官兵勇猛難禦所至奔竄我兵追擊礮賊甚多并俘南軍連日克丹思亦為兩路兵以明亮統之獲生口二人分領明亮督兵策應仍分三支為前後聲援又令三寶帶兵設伏牽制賊勢今奏於二十九日夜半進兵明亮即攻克得里富德攻克河北喇嘛等日寨繞出得里之前會兵奮勇直取赤爾丹思奎林亦攻克河南之得布里所至賊

皆始拒終潰勦戮二百餘獲餘仗火藥無算  
那忘昨歲艱如彼孰謂今番迅若  
茲西路之阿喀木雅美美卡木攔壩皆地險礪堅昨歲攻  
間攻克之價拉易爲原逆料促浸如故尙遲疑小金山番  
實爲迅速而促浸則金川番名也予尙以價拉降番雖爲僧格桑脅  
誘復叛今見逆酋爲索諾木攜去久且爲促浸所併其衆  
必懷怨望而促浸羣賊代攢拉守拒主客之勢不同斷難  
持久收復小金川之尙易爲力早籌度及之曾屢諭將軍  
等今果如所料至金川則險隘如前於制勝之道尙無把  
握聞其賊酋達克賊目丹巴沃雜爾在美諾聚賊佔據  
二賊皆索諾木所恃爲主謀助惡若能將二人設法擒獲  
則賊黨剪除勦平金川之機可得十之六七果爾予心方  
爲稍慰惟仰賴上蒼嘉衆兵鼓勇斯宜耳諸將戒盈  
仍訓之營兵有所依仗亦皆效法知勉是以所向克捷但  
究覺得之太易恐賊人狡計讓我深入賊或以後抄截不  
可不防官兵方乘勝深入自不宜使知此意惟當鼓其銳

氣奮勇成功若領兵之將軍參贊等則不可因連勝稍存  
矜滿必深體滿招損謙受益之訓慎之又慎方能有濟隨  
傳諭切戒之金令兩路將軍參贊查在事出力之將領弁  
兵交部議叙其攻戰時傷亡兵卒雖屬無多亦令查明咨  
部議卹賜卹獎功施次第莫遺無濫慎參差佇賞二豎成擒  
日始得吾心畧慰怡

十四日

公偕色布騰巴爾珠爾奏言

臣

等自十月二十九

日發兵卽由資哩攻至鄂克什所有南北兩山礮  
卡全行克復十一月初一日大兵已進抵路頂宗  
但路頂宗一處峯形陡峻三面懸崖峭壁僅有沿  
溪一線細路螺旋而上陡徑滑沙往往不能駐足

地形實爲險絕且資哩南北兩山等處擊敗賊衆盡皆聚集於此悉力固守並且用礮抵敵以逞螳臂之計若照常攻打不免多需時日自當乘醜徒喪膽之時一鼓而登勢更易於摧敗因令額森特等帶兵由路頂宗繞過南山從上下壓納木扎等帶兵由正路進攻海祿等帶兵由山腿向上仰攻乘夜潛派官兵毫無聲響至初二日子刻侍衛將弁等督同滿漢屯土等兵於至險至峭之地一齊攀越頂趾相接騰凌直上賊番尙無知覺經官兵攀牆躍入突然奮殺賊番放鎗不及均用亂石拋

打我兵合力砍射斃賊三十餘人滾崖跌死者甚衆其餘四散竄逃奪獲礮位鳥鎗長矛腰刀等物甚多當將路頂宗佔據至海蘭察在色布色爾等處亦將所帶之兵分爲三路於初一日下山衝壓旋將別斯滿大小各寨十餘處全行攻獲普爾普帶兵由別斯滿東南下壓山梁礮卡富興等所帶之兵於初一日由班東仰攻兜烏之靠南山峯該處山勢險陡賊人早有隄防奮力進攻未能得手初二日黎明復督官兵攻撲賊衆已過兜烏而西海蘭察之兵亦上兜烏山梁聲勢甚大靠南山峯



之賊旋行奔散富興等卽合力往壓帛噶爾角克等寨其額森特等一克路頂宗卽督兵直攻明郭宗賊見木波帛噶爾角克一帶已有官兵分布勢難支禦分頭竄逸官兵追趕亦有殺死者卽將礮卡搶佔並搜獲寨內所藏米糧甚多惟是官兵自二十九日以來五晝五夜追趕截殺分頭搶佔礮寨又所得各處隘口地方均須畱兵駐守比至攻克明郭宗所存不過二千餘人臣等酌調官兵添助聲勢卽令額森特等由南山梁上進取美諾海祿等由明郭宗下路合攻額森特等比至南山梁

上時已昏黑遂先分兵截取美都喇嘛寺佔據形勢畧齊兵力卽攻撲美諾官寨而海祿之兵又從下路繞至賊衆驚慌乘夜奔竄官兵一面趕殺一面入據官寨共搶獲大礮四尊劈山礮八尊米糧一百餘石訊據來投番人供稱七圖安都爾見大兵已上山梁畱兵看守美諾隻身逃去不知現往何處等語臣等遣人飛探南路官兵尙無信息隨派兵往接至海蘭察處本有兵八千人又有富興等二千餘名從帛噶爾角克礪接續協勦底木達布朗郭宗等處亦必勢如破竹此時金川賊酋兄

第聞之必深震懼而各土司亦可堅其助順之志

奏入

諭曰阿桂等奏初二日連克路頂宗明郭宗等處現已克復美諾並攻得別斯滿兜烏帛噶爾角克磧各情形收復小金川之易朕原早已料及第官兵等能於一二日內連次克復美諾等處剿殺多人並搶獲礮位米糧實屬迅速所有將軍阿桂參贊色布騰巴爾珠爾俱著交部議叙其在事之將弁兵丁均屬出力奮勉並著阿桂等查明咨部議叙如有超衆奮勇者卽行具摺奏聞候朕另降諭旨又據豐昇額等奏從宜喜覓路攻奪沙

壩山梁碯卡殺賊奪械等語宜喜一路此際原係牽綴賊勢今官兵等同日進攻卽能克碯殺賊亦屬出力豐昇額等及在事將弁兵丁等俱著一併交部議叙

又

諭曰阿桂等奏連克路頂宗明郭宗等處現已克復美諾業經降旨交部議叙並諭將攻勦路頂宗之攀越直上官兵從優議叙至何人首先躍入賊碯亦令查明具奏候朕另降諭旨至官兵自進攻以來僅五晝夜卽克復美諾等處可謂迅速但據奏七圖安都爾於官兵甫抵明郭宗卽行逃竄不知所往等語七圖安都爾爲僧格

桑用事頭人所有小金川狡謀惡計多出於彼實爲可恨今自揣力不能支又不肯束手就縛自必仍逃往金川恐未能追獲看來岡達克丹巴沃雜爾料我兵必不歇手自然進兵攻勦遂將美諾等處交付七圖安都爾一人先回金川今七圖安都爾又復竄去可惜失一好機會是以雖聞捷奏不能慰懷也惟是此次進攻因添有滿洲勁旅士氣奮興軍威大振所向克捷以此先聲足令賊衆聞而膽落稍爲可恃今阿桂已經差人往南路通知明亮等會兵想美諾克復之後僧格宗一帶賊人必皆望風潰去明亮等自更易於直進其底木達布

朗郭宗等處亦無難卽時收復阿桂當一面酌量小金川善後事宜及派兵防禦後路糧臺諸務交富勒渾王進泰妥爲經理阿桂明亮卽一面帶兵分路攻剿金川乘將士新勝銳氣鼓勇直前且當賊人未及守禦之時攻其無備成功更爲便利阿桂等當努力爲之佇聽捷音但於何路進攻較妥阿桂尙未籌定朕意美卧溝一路爲兩金川要隘賊人未必於此堵截或可從此而進使之猝不及防又今年夏間賊至木果木軍營後路滋擾並非自昔嶺迎面而來其由金川潛出之路卽可爲衆兵密進之路亦賊所不能預備者若用此兩路兼進

較之當噶爾拉等舊路尤爲妥速著傳諭阿桂將是否  
可行之處卽速妥酌奏聞又豐昇額等攻得沙壩山梁  
賊碉一處因難於駐守隨卽撤毀宜喜一路究難深入  
豐昇額等在彼尙未知小金川捷報今阿桂已將美諾  
等處全行克復卽當進兵攻勦金川自必寄札約會並  
進豐昇額此時當遵前旨率同書麟五岱彰霽等帶領  
官兵馳往丹壩相機攻勦其宜喜一路畱舒常在彼並  
賚往阿桂色布騰巴爾珠爾額森特海祿成德等御用  
黑狐冠各一頂候其到時祇領並聞鄂克什等處之捷  
御製紀事詩一章書賜阿桂亦隨報發往並賞豐昇額

舒常小荷包各四個書麟馬彪五岱彭靄伍爾圖那遜  
小荷包各二個特此傳諭知之

恭錄

御製詩

將軍阿桂奏報克復美諾詩以誌事

收復小金原意料似茲迅速不期中

收復小金川之易予早逆料及之茲據阿

桂奏官軍於十一月初一二等日連克路頂宗明郭宗諸險隘並攻得別斯滿兜烏帛噶爾角克現已克復美諾

駐守其地計自二十九日進兵以來不過五晝夜即已集事實不意其如此之速

詎因事順或滿

志當以賊逃未愜衷

官軍攻剿卡礕時有躍入礕牆斬殪賊眾者有賊正奔潰追擊殲斃者其

墮仆厓墜之賊更無算並收獲礕位十餘米百餘石器仗乾糧亦多惟小金川賊目七圖安都爾聞官兵已上山梁



平定小金川勒銘美諾之碑

即棄美諾而去自必仍竄入金川渠魁未即就擒實爲可惜是以雖聞捷音不以爲喜並諭將軍勿以事順自滿卽宜乘勝速行分路進剿促浸以期獎績並教予優叙乘機制勝此次出力將士仍飭部議叙  
還勵奏膚功先聲討逆軍威振諒彼遊魂計亦窮

恭錄

御製文

平定小金川勒銘美諾之碑

首禍者必有奇禍之遭僭德者必有凶德之報蓋僭拉之首禍實由促浸之教而促浸之僭德亦由僭拉之肇故戊

辰之役以救僭拉而有促浸之征

前因金川侵擾小金川拘其土司澤旺地方官

諭之不從輒敢干抗戊辰冬遣經畧大學士傅恆統禁旅往剿我武方揚而莎羅奔郎卡窮蹙乞命因矜其頑蠢遂

允受降澤旺乃得復歸故地郎卡始尚畏懼斂跡未十年輒思吞噬鄰封時相讎殺彼時以蠻觸爭衡乃其常事亦遂聽之郎卡既死其子索諾木轉與小金川僧格桑狼狽為奸負恩梗化遂致復勞師旅深悔前此之姑息矣茲辛卯之師以伐儻拉乃金促浸而掃僧格桑恃有索諾木黨惡欺蔑鄰疆攻圍鄂克什官寨估其境地羈其土司經前督臣阿爾泰等往諭罷兵退地逆酋陽奉陰違浸至辛卯夏僧格桑乘索諾木侵害草布什咱土司之釁益復滋橫益且修築碉卡謀抗天朝勢不得不加以兵革而阿爾泰因循貽誤遂命溫福由滇入蜀授以大學士統兵征勦即攻克巴朗拉繼又克復達圍一帶以至資哩官兵前抵路頂宗仍不能進壬辰夏阿桂以參贊赴南路統兵於是年冬攻克僧格宗甫半月即乘勝攻得美諾其餘寨落悉傳檄撫定小金川平而僧格桑逃往金川索諾木匿彼其緩則頡利突利之相而不獻於是移兵並討促浸矣

猜急則僑如榮如之相保然而地險人強機謀深造則儻拉遠不如促浸故美諾再入而再克

美諾未嘗不險而一克僧格宗其勢遂如

破竹逆酋僧格桑初竄布朗郭宗溫福由明郭宗統兵往  
捕僧格桑已從美卧溝遁入金川擒其父澤旺以歸溫福  
爲將軍始猶勇往繼乃昧於籌畫又不得人心癸巳夏賊  
衆從前路潛出遂有木果木之變美諾亦尋失去乃命阿  
桂爲定西將軍發八旗勁旅往剿阿桂部署稍定於十月  
二十九日進兵自資哩至美諾五晝夜悉行恢復實爲神  
速而僧格桑既至金川索諾木卽羈留不遣卽其擾木果  
木但令小金川賊目七圖安都爾同往美諾號召而不使  
僧格桑復還故巢則索諾木之密圖吞併償拉以次蠶食  
旁近土司僉且欲侵及內地固已漸露端倪罪惡貫盈實  
難輕追耳雖南有僧格宗北有明郭宗而我師奮力攻取無不  
立摧堅碣遂據官寨之穴窖美諾爲小金川官寨卽其巢穴也此固皇天  
助順將卒盡力而亦其首禍尙德之招是用勒銘曾巢永鎮  
俾徼

十一月十五日

諭曰阿桂之子阿彌達著補授二等侍衛

十八日

諭曰阿桂克復美諾等處聲勢甚盛其底木達布朗郭宗等處想亦可卽時收復是小金川全局已定自當迅速分路攻剿金川且我兵連勝之後人皆鼓勇直前正當乘其銳氣相機直進或金川賊衆倉猝未及堅拒或見我兵所向克捷懾我先聲不能如前固守官兵竟得乘勢深入亦未可知且番地冬三月尙有晴霽之日交春以後雨雪漸多至夏不止阿桂等進兵趁此天氣晴暖進攻更易爲力卽我滿洲勁旅固屬可恃然亦當乘其

新勝用之其勇銳自可一以當百實爲事半功倍卽緣營兵衆離家遠調誰不願成功速還久則心懈而氣亦餒所謂兵貴神速也各路將軍等均當深體朕意上緊趕辦佇望捷音至明亮等所稱已得各處俱派妥幹之員駐守等語自應如此籌辦卽阿桂處有應派兵防禦者令富勒渾王進泰帶領妥辦已屢降諭旨阿桂等卽當遵照籌酌而行

十九日

公偕色布騰巴爾珠爾奏言查海蘭察等帶兵八千由別斯滿一路直壓帛噶爾角克聲勢已盛

臣

等又於富興烏什哈達等所帶兵三千內派撥二千餘名令富德等帶領前往接應益札知海蘭察等卽由帛噶爾角克進取岱多喇嘛寺旋據海蘭察等報稱查看帛噶爾角克東西山梁石卡九座俱有賊番據守隨於初三日分兵三路奮迅進攻殺死賊番十餘名餘皆奔竄將帛噶爾角克一帶寨落全行攻克所有緊要處所分兵據守其曾爾曾帶兵攻打之色布色爾山梁亦於初二日黎明擊敗賊番攻克碉座十餘處惟是官兵自上北山以來夜寒風冽因潛行進攻俱未攜帶帳房亦不

令其舉火及至攻克帛噶爾角克業經七日七夜  
攀崖越險行走打仗畧無稍暇海蘭察等於帛噶  
爾角克稍歇兵力卽率兵進攻又據報稱我兵由  
帛噶爾角克進據岱多喇嘛寺木波寨等處聞簇  
拉角克山梁有賊把守我兵卽由上下兩路分兵  
攻取行至布朗郭宗附近之處賊番亦從上下兩  
路來迎我兵奮勇直前殺賊二十餘名將布朗郭  
宗底木達攻取先後收穫糧石約共四千餘斛等  
語至明亮富德等南路官兵於初四日尙無信息  
而臣等中路之兵現在不滿六千量於美諾附近

緊要隘口分撥安卡卽令降番持清字公文前往南路通知明亮盆卽於初五日夜派副都統福珠里總兵成德等帶兵迅往接濟初六日前至舍壘據報該處番民先已投順初七日據派往之降番持明亮等同札內稱本月初六日已將僧格宗等處克復俟分防後路事畢卽馳赴美諾同日盆據福珠里成德等報稱已在鳩瑪爾里地方與明亮等前哨之兵會合是小金川地方大局已定雖尙有大板昭瑪爾當等碉寨現今海蘭察帶兵往剿臣等一與明亮富德會合卽將進剿金川事宜悉



心籌酌議定道路另行馳奏至已降復叛之番人本不可畱但若盡法處治不獨小金川人斷絕來歸之念且恐金川賊衆益堅死守若任其散處則進兵之後又不免有後顧之虞臣等再三籌酌此時除打仗拏獲及查出情節可惡者卽時誅戮外其餘脅從之人將眷屬移往各土司地方存住精壯番民仍令隨營打仗出力益飭令各土司嚴加約束畱心查察倘稍有踪跡可疑隨時嚴辦至美諾官寨及美都喇嘛寺昨已焚燒其各處大寨益飭帶兵將弁一併焚燬其陸續移往別處及逃往

金川叛番之空寨將來亦漸次焚燬以絕此後賊  
番窺佔容俟辦理奏聞此次師行奮迅其人夫糧  
站萬不能赶上安設今明郭宗美諾等處節次皆  
得米石而帛噶爾角克等處獲米尤多臣等卽以  
此項散給官兵作爲口糧頗足以濟輓輸之不及  
至所得大礮四位前已奏明外其劈山礮前後共  
獲一十六位鳥鎗一百六十餘桿火藥一萬四千  
餘斤火繩約二千七百餘盤鎗子約十餘萬大小  
礮子五百餘個盆茅刀籐牌鉛鐵等項均令隨營  
備用奏入

諭曰現在小金川均經收復自當乘勢進攻但進兵應用何路至今未據阿桂奏到前日會計及美卧溝與木果木之後皆係賊人潛出之路或可由彼進攻出其不意似爲便利曾經諭商阿桂令其熟籌妥辦阿桂接奉前旨自必斟酌辦理但各路地利寬窄及賊番守拒虛實均不可不因其形勢相機進取著傳諭阿桂一面籌度速辦一面奏聞再攻勦金川未必能如克復小金川之易或因官兵所向克捷賊番懾我先聲不復似前次之固守官兵仍可乘勝進取亦未可知但恐賊番詭詐多端見新添滿洲勁旅勇銳百倍不敢撓我之鋒官兵所

至賊畱空礮遁去讓入賊乃逞其故智從後抄襲  
所關甚爲緊要阿桂等各路進攻金川如遇有賊衆棄  
礮奔潰之處察其情涉誑誘者當慎之又慎整隊以次  
續進使後路仍有策應之兵方爲妥善再明亮等在南  
路連次得勝海蘭察等在西路亦甚奮勉均屬可嘉明  
亮富德奎林海蘭察曾爾曾均著賞給御用黑狐冠各  
一頂隨軍報發去

二十三日

公偕色布騰巴爾珠爾奏言查大兵克復底木達  
布朗郭宗等處附近各寨番民陸續來投惟東南

山溝內達扎寨頭人阿枯魯藏匿礮內拒守因卽  
派兵前往圍剿將阿枯魯殺死並獲跟隨活口亦  
俱正法所有賊人家口賞給屯練土兵其大板昭  
瑪爾當等處正在派兵往剿據穆塔爾安篤爾報  
稱大板昭瑪爾當曾頭溝各寨番人內皆有我等  
親戚今聞大兵將至親赴軍營懇請投降我等已  
暫爲安頓其有逃入林箐者現在搜查至金川逆  
賊早已聞風遠竄臣等酌派漢土官兵前往逐一  
清查辦理又據木坪土司甲爾參納木卡稟稱邊  
諭差人至汗牛各寨據番民等稱去年投順以來

承受

天朝恩典極爲深厚今年兩金川滋擾後路我等自守巢穴總不敢附和今蒙差人來諭斷不敢稍有二心土司現在親赴彼處料理等語查從美諾至大板昭曾頭溝計程二百四十五里此一帶地方遼廓番寨甚多今大兵所到卽已望風丐命而汗牛各寨又復歸誠恐後所有收復小金川之局業經竣事奏入

上嘉之

公又偕色布騰巴爾珠爾奏言

臣

等查附近大板

昭之凱立葉及谷噶兩路雖距南路章谷等處稍遠但前據通事稟稱該處道路尙可進兵是以節次奏

聞金蒙

皇上指示若何作爲正路令臣阿桂由此而進彼時該地方悉爲賊據未可遣人往探今收復之後臣等已派妥密能事之人前往密看山川形勢果否易於進取俟其查探回時另行奏覆奏入

諭曰阿桂奏收復大板昭曾頭溝併汗牛番人降順小金川全境蕩平又籌降番事宜所辦甚妥但兵貴神速官

軍早進一日賊人守禦尙未甚堅或能攻其無備乘勢得手亦未可定至凱立葉谷噶等處與大板昭相近阿桂在日隆未收小金川之前自難探其詳細今大板昭旣已克復則詢訪尤易得實亦當及早查明如可作爲正路阿桂卽於此進兵至收復小金川所向克捷實由新添滿洲勁旅聲勢甚盛其先聲足以令賊怖讐今阿桂等統兵進剿金川必擇形勢便利可以打仗得手之處將賊衆多加殲戮使皆望風喪膽各路攻剿自更易爲力

恭錄



御製詩

將軍阿桂奏報收復小金川全境詩以誌事

事之將難上峻山事之將易下順水旬日全定小金川幅  
員五百有餘里自十一月十四日接阿桂美諾捷報後十  
九日復據奏海蘭察由別斯滿一路於初  
三日直壓帛噶爾角克取岱都喇嘛寺隨攻克布朗郭宗  
底木達獲糧約四千餘斛其明亮之所剿河北河南各寨  
落以次收獲二十三又據奏小金川授三等侍衛銜穆  
塔爾報稱大板昭馬爾當會頭溝各寨番人俱懇請投降  
其汗牛各番民亦各投順並聲叙從前不敢附賊之語自  
初一二等日攻取明郭宗各寨至此收復小金川全境僅  
及旬日實爲迅速其自美諾經底木達至大板昭計程二  
百四五十里而自美諾由南路至汗牛一帶程途亦約畧  
相迴思六月僨事時猖獗賊亦迅如此一朝失亦一朝得  
天道好還原定理整兵直進討促浸雪嶺險滑仍如彼擬

欲持以久困之復慮師老致委靡賈勇及鋒而用壯收復  
之易朕久意料及之至進勦促浸恐未能迅速集事因諭  
阿桂等訪覓妥捷之徑分兵夾攻或可易於得手其功噶  
爾拉當噶爾拉兩路只可用爲牽制賊勢若仍作爲正路  
恐賊人抵禦如故卽或待以日月持久困守又恐師老志  
懈自當乘此新勝銳氣令其賈勇一月三捷心焉企我非  
直前及鋒而用自爲事半功倍  
顯武願佳兵撻伐由來不得已

十二月初三日

公偕明亮色布騰巴爾珠爾奏言此時進勦金川  
所有分路進兵之處臣等久經畱心體訪今公同  
酌議查功噶爾拉及木果木兩處山高雪大氣候  
惡劣峯巒險削賊人礪卡如林當噶爾拉雖有可

通之路自大兵撤後防範益密誠如

聖諭從此三路進兵實爲無益惟凱立葉一處詢據土人稱可以進兵自大兵克復瑪爾當大板昭後已遣妥人前往密探其谷噶地方與凱立葉相近將來或派兵益進或在兩路中擇一路作爲正路一路酌量揚威臨時再行辦理至臣明亮南路查有河北之馬柰馬爾邦等處本係乾隆十二三年進兵之路又其地係巴旺布拉克底之邊界後路尙可放心自應於此處進剿惟是南路官兵移在馬柰馬爾邦西路官兵移在凱立葉等處則是東北抵

西南相距遼遠其間緊要隘口已不下十餘處而重崖深箐可通之小路更多若於此一帶均設糧臺驛站必須分兵據守而自巴朗拉日隆關以至美諾各臺站亦尙須多兵防範計非八千以上不可且非熟於形勢善於帶兵之將領數人不足以資控制今總計西南兩路兵力不過四萬有餘臣阿桂等卽於凱立葉谷噶等處進兵而自底木達以至大板昭及瑪爾當等各隘口仍須派兵數千駐防將來或欲再分一路已屬不敷而臣明亮等卽從馬柰馬爾邦進攻其後路如章谷卡丫達烏

等處須兵防範亦多此兩路中間橫亘五百餘里各處畱防分去八九千人則每路僅存一萬五六千人又各去附近應防要隘之兵則所存兵不過萬餘僅能與賊相持斷不能奮迅攻進而兩路能事將弁不過數員置之駐守之地則帶兵打仗轉至無人可用臣阿桂伏思小金川全境番人旣均內徙寨落已悉焚燒此一帶地方盡爲荒山空壤美諾亦成廢地卽不設兵駐守其小金川之竄在金州者亦難再出佔據而金川正當分路剿殺之時亦斷不能分人再佔小金川之地若使小金川

人仍回本地則又分減金川螳臂之力臣等此時

惟期後路稍省一兵卽多增一進剿之用臣等悉

心籌議自美諾西至僧格宗東至大板昭三四百

里內竟可無須大兵駐守此時達木巴宗日隆等

處糧貯頗多尙須多兵駐守一俟糧石運完彼時

鄂克什路頂宗等處只須畱兵三千以資護衛更

可餘出多兵以爲攻剿之用至臣明亮處僧格宗

一帶亦可無庸駐兵惟章谷所關緊要請將所餘

之楚兵一千調往分駐其凱立葉谷噶等處距三

雜谷本近所有官兵糧運將來卽從三雜谷運往

較之仍由西路卧龍關而至美諾由美諾而至底木達布朗郭宗前抵凱立葉谷噶等處程途較近脚價亦省且三雜谷一帶自去年以來臺站久經安設今不過畧添數站每站酌添人夫初不煩另起爐竈而西自卡丫東至底木達布朗郭宗中間舊時所設糧臺驛站悉可裁減至達木巴宗曰隆一帶存糧三萬餘石較之由打箭爐運出之糧脚價本輕今卽令總理糧務司道催趲人夫由美諾撥運章谷一帶接濟南路軍儲旣爲捷便且多節省其餘酌從別斯滿溝運到底木達等處以供

支給至底木達布朗郭宗與谷噶凱立葉等處相距百餘里今海蘭察等尙駐底木達等處官兵從何路進剿賊人無從揣測臣阿桂等部署一定卽速前往底木達帶兵進剿仰仗

皇上威福更可易於攻克臣明亮等亦同時並舉使其猝不及防奏入

諭曰爾等所議甚是不入虎穴不得虎子勉之惟候捷音速至

公又奏言川省各路軍營近蒙

皇上派給滿漢各兵合以舊有之兵及各後路防護糧臺



統計七萬兵數不爲不多但此時美諾一帶三四  
百里之內卽不設兵駐守亦須分兵三四千畱防  
鄂克什地方而附近凱立葉谷噶等處如底木達  
大板昭瑪爾當各隘又須分兵駐守是此路進剿  
之兵僅敷一路之用若再有酌量情形分投采入  
之處卽屬不敷查漢軍烏鎗火器較勝綠營如蒙  
俞允酌派四千此項漢軍所需火藥箭枝均可無庸攜帶  
則行走輕便且漢軍本能步行如直隸山西陝西  
等處不過酌給車輛川省則酌給人夫供運行裝  
沿途亦無多費

公又偕色布騰巴爾珠爾奏言臣等分撥小金川  
降番如屯練及瓦寺土司原有頭人土兵隨營打  
仗卽令其派人將婦女老幼一併押解而鄂克什  
土司亦經親自領回旣省官兵解送之勞且以番  
人管解番人更無虞其竄逸至於高礪大寨若用  
人力削平旣需多兵且稽時日今乘冬令乾燥舉  
火焚燒立時可燼其火力所不到者始令兵丁拆  
毀亦易於摧枯拉朽此時河北之小金川番人旣  
已遷徙將盡其在河南者又現在分別辦理總使  
進兵後金川賊人無從勾結而脅令竄入之小金

川番人舊時莊稼盡化荒蕪既無口糧可覓又無  
礮卡可依斷不能潛爲盤踞後路分防較爲省力  
此次西路降番除發交瓦寺土司六百七十餘名  
口鄂克什土司二百餘名口外其餘撥往雜谷腦  
等處令屯弁管轄者亦已撥往五百十九名口令  
於二道橋以內附近閑空地地方妥爲安置該番移  
往時各自攜帶家口不敢稍有桀驁至臣阿桂在  
南路時收復宅壘拉約等處降番一百餘名前經  
安插巴旺布拉克底盆明正地方今仍令照常居  
住臣明亮等新收之宅壘鳩寨一百五十名亦均

交各土司頭人分別安置以資管束均奏入

諭曰阿桂議於谷噶凱立葉及馬柰馬爾邦兩路籌辦糧運並防範後路之處俱尙合宜惟稱小金川全境番人既均內徙寨落焚燒卽不設兵駐守亦難再行佔據所言殊未當理阿桂之意不過以後路稍省一兵卽可多增一進剿之用所見者小而所昧者大當今進剿金川行軍機要所關甚重內外諸臣熟悉軍旅實無出阿桂之右何於此等最要節目疏畧若此小金川密邇金川地關扼要昨歲官兵攻打半年始能攻得今歲則旬日之間悉行收復其勢又屬太易前此惟恐阿桂等意存

矜滿曾屢降旨令其加意謹飭初不料其將美諾一路忽不經意至此況我軍此次因添滿洲勁旅所向克捷聲勢甚盛正當將克復之小金川全境妥爲安置使官兵藉以爲根基賊酋稍有所畏懼所謂得寸則寸前此西陲用兵皆係如此辦理阿桂豈忽而忘之況兩將軍分路進兵中間正當聲息相通方爲有益若有阻隔亦多未便阿桂何全未籌及此耶至豐昇額帶兵由丹壩一路進攻固亦備用之一策但現在阿桂所進之谷噶凱立葉俱係通勒烏圍之路相距丹壩不遠阿桂到後或酌量該處有可進情形不妨酌調豐昇額速赴谷噶

等處籌辦均係國家公務原不庸稍分畛域也

又

諭曰據阿桂等奏分路進攻金川請添調漢軍官兵四千協勦等語阿桂等現已進勦金川所需添兵一節若向遼省撥調未免鞭長莫及惟荊州駐防及湖北各標營入川較近尙可量爲添撥著傳諭陳輝祖卽速於荊州駐防兵內再調一千名令副都統書明阿帶往所有料理軍行事宜悉照前此綽和諾所辦妥協經理俾令迅速遄行益於湖北川省綠營兵內抽撥一千名料理前往其帶兵將領該省此際恐未必有出色之總兵大員

或可於副參內揀派熟諳帶兵之人卽令其統領趨行  
仍飭沿途地方官一體妥速預備毋致遲滯著傳令陳  
輝祖金阿桂知之

十二月十二日

公偕色布騰巴爾珠爾奏言查攻剿金川道路  
等連日以來通盤籌計所有各噶凱立葉兩處詢  
之通事頭人等所稱道路形勢雖各有不同然較  
之昔嶺功噶爾拉等處究係未經攻打之地賊酋  
卽有預備或尙不至十分嚴密其凱立葉一處頭  
人等稱須從三雜谷地方行走臣等此時擬先於

谷噶進攻俟抵谷噶之後察看賊番光景酌量分  
兵數千由雜谷地方前往託名撥赴綽斯甲布軍  
營一至凱立葉路口卽從此入庶使賊番無由知  
覺若能攻過凱立葉則谷噶之兵亦可會合采入  
至南路官兵已議從馬柰馬爾邦進取近日巴旺  
布拉克底頭人均來美諾臣等詳加詢問據稱河  
南之博堵距布拉克底之深嘉卜甚近河北之馬  
柰等寨向係布拉克底故地土司等派土兵前往  
而以大兵繼之猝然搶佔可望得力但仍須於當  
噶爾拉駐兵以分賊勢另派官兵從臨卡深嘉卜



繞出分攻博堵馬柰而卡卡角馬爾邦等處以次  
派兵進取則河南之兵可以進攻曾達河北之兵  
可以直取馬爾邦今臣阿桂現駐美諾賊人必專  
守功噶爾拉昔嶺一帶或於各處未經進發之前  
乘其不備先從巴旺布拉克底地方掩襲抑或仍  
須各路分攻之時突然進取已令巴旺等頭人前  
往踴探諒數日即可探明稟覆查金川番衆無多  
所以堅心死守者恃其險阻之故但賊境四面皆  
山形如釜底若多兵而多路一路得勢各路皆迎  
刃而解今不但臣等現有之兵欲分谷噶凱立葉

兩處尙覺不敷卽南路一面從當噶爾拉牽綴一  
面從深嘉卜臨卡分攻兵力亦不無單弱是以臣  
阿桂萬不得已前此旣爲省兵之計又爲請兵之  
奏至臣等此時籌畫必期迅速擒渠掃穴未可仍  
以上年輕率前驅轉成頓阻且以現在人夫而論  
若欲設臺隨營供用勢尙不敷臣等一面籌辦進  
剿機宜一面催令督臣等預備妥協庶臨期無虞  
掣肘

公又奏言

臣接奉

上諭令於富勒渾王進泰二人中酌派防守後路

臣查富

勒渾王進泰均屬小心謹慎然過慎則惠遇有番人卽不免望而生疑而用內地稽查盤詰之法施之新附外番其情斷不能安且該督等於山川形勢以及軍行機要均未能悉臣查副都統成果於畱防事宜尙堪勝任雲南提督常青練習軍務並熟習邊情本皆爲軍營得用之人但成果尙有腿疾而常青近亦羸弱多病卽日大兵前進遇有緊要後路酌令成果帶兵駐守如尙需人再令常青往駐庶可無虞均奏入

諭曰阿桂駐在美諾已經一月若俟朕批摺同時已四十

餘日距所擬歲底歲初剋期合勦之說正當其時阿桂  
各項部署諒應就緒務卽酌派妥協與豐昇額明亮訂  
期會勦仍將進兵日期迅速奏聞至阿桂所擬谷噶凱  
立葉及馬柰馬爾邦兩路進兵若此時早事聲張賊得  
以預爲防堵殊屬非計如欲赴馬柰一路應令奎林或  
富德統兵徑往當噶爾拉進攻使賊信我兵仍由原路  
進勦力爲堵禦我兵仍赴馬柰等處出其不意自可易  
於得手其欲赴谷噶等處者亦當於功噶爾拉山梁派  
兵攻勦以綴賊番全勢而我兵乃潛由大板昭直取谷  
噶凱立葉兩路亦使賊番猝不及備如此方合用兵指

東擊西奇正虛實並用之道阿桂熟於軍務當妥酌實力爲之佇聽捷音又據奏小金川全境必要能事之大員始堪督率富勒渾王進泰二人均屬小心謹慎然過慎則蕙此論頗爲近理前此原以二人身任督提地方乃其專責且呼應亦靈是以派令後路照料今阿桂所奏如此則二人自不足恃據稱雲南提督常青練習軍務熟習邊情於緊要之路酌令常青往駐等語常青畱駐美諾等處自爲有益已有旨令富勒渾等諸事與之虛衷商酌勿稍存畛域之見並著阿桂轉諭常青一切當引爲己任勿以現有提督在彼稍存推諉仍將辦理

情形具摺奏聞至美諾既有常青已爲足恃成果雖有  
腿疾然帶兵諳習實爲得力之人阿桂若由凱立葉進  
兵則三雜谷後路宜有接應當令成果帶兵一二千在  
三雜谷駐守可卽妥酌行之

十五日

公偕明亮豐昇額鄂寶富勒渾文綬奏言查川省  
各屬辦運軍糧遠近遲速不同口外站長道險夏  
防雨水冬慮冰雪農忙則人夫短少草枯則烏拉  
又稀因地乘時情形互異卽如西路從前自明郭  
宗至登春木果木等處官兵夫役不下四萬餘人

約月需米一萬餘石其後桃關卧龍關一帶水發  
運道阻至半月有餘軍營及沿途各站若非稍有  
積儲卽不免於貽悞是以向來籌辦軍糧不敢不  
畧爲寬餘儲備至於餉銀一項除支發軍營官兵  
夫匠鹽菜工食之外附近臺站所需站夫工價等  
項亦由隨營總理道分發站員支放約計兩月費  
用一併起運俟將次用完再行發解此應時辦貯  
糧餉之實在情形也惟是軍需各款固宜儲備充  
足亦須斟酌緩急歸於慎重誠如

聖諭必籌可進可退之計方爲妥善

臣

等公同查酌軍營

奉

旨加賞之件原係臨時咨解其平時卹賞銀兩紬緞布疋等物亦俱隨時酌調備用卽鹽菜工食銀兩以及火藥銅鐵等物均可按數核定計月運供惟糧米一項寬餘存貯之地必須近便庶緩急足恃以目下情形而論西路之日隆南路之章谷綽斯甲布之周叟積貯金宜寬裕但其地皆在各土司境內距桃關打箭爐雜谷腦等處自二十餘站至三十餘站不等倘按月辦運之糧一有短缺或乘勝采入添站增夫需糧緊迫近處無從取攜遠供不免



竭蹶恐致周章

臣

等悉心酌議凡備貯軍需之地

當遠近兼資層遞相及毋令積聚一處大率軍營  
於逐日支放之外須常餘一月之糧銀五六千兩  
火藥三萬餘斤銅鐵等項只須足用今大兵攻克  
美諾賊巢迅速前進則達木巴宗鄂克什等處均  
當貯米數千石其南路之打箭爐章谷綽斯甲布  
之梭磨從噶克周叟盆應倣此分貯各路總理司  
道府等量地勢之遠近時候之早晚數目之盈絀  
隨時稟商臣等酌核情形督令分路轉輸則接濟  
既便亦不致積多成累至綽斯甲布糧運較西南

兩路尤遠今春由雜谷打箭爐兩路並進夏秋頗覺充盈今打箭爐專運章谷人將木池軍糧停止且時方冬令烏拉歸巢勢亦不能雇覓現在止由雜谷一路照常運供舊糧日支之外既漸減少而以後照新定章程酌辦亦無虞壅積奏入

諭曰阿桂等酌議軍營備儲糧餉等項亦只可如此辦理現在籌定分路克日進剿以期迅速采入則糧運各項愈進愈遠護糧夫役最關緊要前經傳令富勒渾等妥選強壯夫役練習器械護行如州縣之設立民壯亦足以資捍衛昨已據富勒渾等奏稱遵旨通飭選派惟在

該督等董率糧站各員酌量緩急隨時妥辦

二十日

公偕色布騰巴爾珠爾奏言金川賊人前來投稟  
僧格桑現在拘禁官寨患病沉重請一位大人前  
來我卽將僧格桑全尸獻出至頭人七圖安都爾  
未利阿什咱聞已爲小金川百姓所殺我地方上  
實無其人等語臣等思賊番狡詐百出僧格桑是  
否病重斷難憑信且謂小金川頭人已被番人殺  
死其爲客留逆目更屬顯然况又請大人前往其  
意必要以撤兵完事方始送還實爲可恨可惡此

不但決無遣人前往之理即使獻出僧格桑金送還頭人番衆而此罪大惡極之逆酋萬無可宥其稟詞狂吠自不值與通言語但逆酋兄弟雖出此言已覺心存惟怯其拘禁僧格桑實不無希冀獻出完事之想臣等仍令額森特給與回轍嚴加斥責查大兵此時分駐美諾及底木達布朗郭宗等處尙無動靜賊正不能測我意指若又間予之以回諭賊人非探我此時尙須等齊兵力卽疑

天朝或有得僧格桑歇手之心遲回觀望預備稍疏便可乘間搶佔一二處以圖采入至進兵道路機宜密

之又密卽鎮將等不得與聞賊雖屢來卡外亦不虞有窺探漏洩之弊

公又偕色布騰巴爾珠爾奏言

臣

等將谷噶一路

詢之三等侍衛穆塔爾據稱谷噶道路崎嶇樹林深密但係未經攻剿之地較之昔嶺功噶爾拉似當稍易若密派精兵晝伏夜行猝然攻佔或可望其得手等語

臣

等察其所言頗爲得理此時已派兵數百從登春簇拉角克美卧溝直抵大板昭曾頭溝等處作爲查搜林箐捕捉逃亡之狀仍卽撤回使賊無從窺測而官兵等借此於小金川交界

地方察看山勢情形雖不能直入逆會界內探其險易而大局旣知卽可爲虛虛實實聲東擊西之計其自美諾而至谷噶計程約有八九站若令各處分駐之兵撤回前往賊人窺破卽無難於兩三日間將谷噶一路要隘悉行防守臣等再四熟籌此時海蘭察等帶在底木達布朗郭宗之兵已有萬餘再於各處存兵內挑選精銳約於定期之前密令官兵夜間潛往而附近功噶爾拉等處之兵仍令其逐漸移營多舉烟火虛張聲勢使賊人注意於此俟我潛往谷噶之兵佔得要隘再撤功噶

爾拉一帶分布之兵并力赴彼合攻可期采入

公又偕色布騰巴爾珠爾奏言查進兵道路

臣等

久已畱心體訪據頭人土弁等稱美卧溝形勢雖  
非甚險而進至相近賊境之勒烏溝林樹叢生並  
多坡礪最易潛來繞截大軍由此前行不能便利  
且後路綿長難於接續其大板昭一處賊人來路  
卽係谷噶等處現擬進攻之地此時籌辦進剿後  
路必期無虞前進必期采入而已叛復降之番亦  
必盡爲安頓不使再生事端方爲妥善誠以賊會  
詭計多端務須倍加慎重計出萬全固不肯稍有

遲延亦不敢畧爲疎忽至此種降番內男女屬眷  
已移往土司屯弁地方分別安插其精壯之人仍  
令來營打仗安插何處卽入於該處土兵內令其  
頭人管領查屯練及瓦寺木坪鄂克什土兵其數  
均倍於降番自屬易爲鈐制且前此降番滋事皆  
因家口尙在本寨而此次番人亦因不及挈眷竄  
逃所以仍舊投誠今各番家口旣分散在數百里  
以外且伊各有顧戀之心無虞再行逃逸奏入報

聞

公又偕色布騰巴爾珠爾奏言小金川各寨降番



聚處易於生變必須分散各處使其勢孤力弱始不能復行滋事但須就其地之遠近人之多寡以爲分撥又須各就土司戶口多寡分別賞給臣等將彭魯爾各寨及覺寨番人共六百八十餘名口均交瓦寺土司管束瓦寺距美諾二十餘站自不能潛歸故地至木坪人戶雖少附近內地業將山扎舍壘等寨五百六十名口交與該處安置其底木達會頭溝等寨若亦發交瓦寺木坪則路遠人多恐難照料自應於雜谷腦五寨內附近內地之處分與屯弁管束旣與相聚而居斷難再行竄逸

是以撥往一千九百餘名至鄂克什土司本地番  
戶稀少且逼近小金川地方賞撥過多轉恐不敷  
彈壓是以僅撥二百八十餘名交其管轄其餘零  
星寨落戶口賞給巴旺布拉克底二十九名草布  
什咱二十八名該番等分別遷徙之時或卽令屯  
土各兵押往或約派綠旗官兵同行降番等扶老  
攜幼欣然願往並無一人逃逸且木坪土司甲爾  
參納木卡瓦寺土舍薩郎雍中及屯弁阿忠等咸  
稱降番安插之初所有居住房屋開墾地畝均愿  
爲之幫助伊等更可得安生理至穆塔爾於一切

差使盡心奮勉前此隨往底木達等處招撫各寨亦得其力本應稍示優異但小金川全地此時並無居人伊亦不便仍居故寨而伊叔諾諾木原係別斯滿一寨頭人此時大兵一至卽先投到並協同擒剿多人具見誠順今穆塔爾欲攜其屬番隨同伊叔居住因將別斯滿五寨內之木爾思嘉大壩尼等寨番人給其管理其餘漢瓦色爾木覺木等寨查有屯練土都司阿忠保在南路督率士兵打仗最爲奮勉卽令其管轄此別斯滿五寨番民與穆塔爾屬番亦共有六七百名口統計臣等西

路所收降番幾四千有餘臣阿桂前在南路安  
插明正巴旺布拉克底之一百餘名及明亮等所  
收宅壘思鳩兩寨一百五十餘名此時均已安插  
全竣再上年清查小金川降番共有八千餘人今  
除此四千餘名口外汗牛十四寨此時約存一千  
四百餘名是小金川全境降番約計已有六千而  
本年六月間臣阿桂在南路派兵四出誅殲臣其  
婦女賞給巴旺布拉克底者又不下一千數百人  
合以舊數計小金川之人在金川者不過千餘臣  
等於查點戶口時先將精壯之人逐一註明飭交

各土司等將其家口安定卽押來營隨同攻勦彼時竄畱金川之小金川番人見其同類均已得生或有妻子畱於本寨者詢之遷徙之餘亦皆無恙則投出者必多自不慮其轉同金川死守奏入報

聞

公又偕色布騰巴爾珠爾奏言三雜谷土司於十二月初三日派兵一千五百名來美諾大營

臣等

諭以

天朝恩典深厚且近日加封名號賞戴花翎榮幸已極爾等應思如何出力或誑誘賊人多爲勦殺或察看

道路進搗其巢實有一番自効之處方見誠心該  
頭人等聞言均各欣喜奏入報

聞

二十七日

公偕色布騰巴爾珠爾奏言進剿金川道路臣等  
前此密加訪問惟谷噶凱立葉較爲易進惟是臣  
等帶領進剿及後路一帶官兵共二萬六千餘名  
此時美諾底木達擇其最要緊者已分撥留兵五  
千七百餘名至從噶爾薩爾前抵谷噶其中梭洛  
柏古一處尙須留兵五百名又自梭洛柏古至谷

噶溝口及溝口以北之曾頭溝孟拜拉二處又須各畱兵五百名其自溝口至谷噶丫口及抵賊碉共計一百餘里樹林深密道路叢雜亦非三千兵不敷駐守是以去兵萬餘據穆塔爾等稱從谷噶前進至二道山梁碉卡始爲嚴密若出其不意搶得此處可以下壓格魯瓦覺三寨格魯瓦覺去勒烏圍不過五六十里官兵至此卽已下溝行走若不佔據格魯瓦覺之北凱立葉一道山梁恐賊人穿林越箐憑高繞截則後路甚屬可慮必須再派官兵由薩爾赤鄂羅山同時分佔凱立葉山梁則

不但谷噶一路可以前進無虞而凱立葉若有多  
兵循山而下直至河邊則作固頂以下賊人礮卡  
已經隔斷在外而穆爾津岡之險不攻自破賊必  
不能固守但止從凱立葉前進而谷噶無兵亦恐  
賊人翻過山梁截斷後路是此二處必應亟進分  
攻第<sub>臣</sub>等進至谷口後僅存兵一萬五六千名若  
分兩路每路只有八千而薩爾赤鄂羅山一帶又  
須畱兵防守萬萬不敷前進查凱立葉一處卽豐  
昇額摺內所指穆爾津岡之南山據稱業經訪得  
但恐兵力不敷等語查從前岳鍾琪在丹壩進攻



彼時穆爾津岡尙爲我兵所據然攻至年餘未經寸進此時進攻亦難望其立時摧破况卽得穆爾津岡尙須攻過康巴達以至凱立葉迤下地方始能前進今若佔據凱立葉則直出康巴達之前自更爲捷便臣等昨奉

諭旨現在谷噶凱立葉俱係通勒烏圍之路距丹壩不遠阿桂到後或該處有可進情形不妨酌畱豐昇額速赴谷噶等處籌辦查賊人狡惡異常若俟臣等到彼攻打之後始行酌調豐昇額前來則凱立葉一帶地方早已防守嚴密自不如乘此大兵未動

賊人毫無知覺之時令豐昇額卽從凱立葉進攻庶爲得力查豐昇額現已帶新兵三千三百名其湖廣兵二千均於歲底春初全到是已有兵五千餘而五福原帶駐守丹壩之漢土官兵二千餘及署總兵官達色舊任梭磨等處之一千九百餘名內尙可抽用二千名約共可得七千臣等再酌量幫給兵力約可敷一路之用且豐昇額現駐之處詢問道路至凱立葉不過四五站而凱立葉與谷噶分路之處相距亦只三十餘里定期密約帶兵會合從此併力進攻仰仗

天威可望得手

臣

等實因此時攻勦金川並無妥捷之路

惟此二處賊人防範尙不甚嚴道路亦爲較易而就現有兵力既不敷二路之用且亦更無可調之兵卽有新調官兵亦斷無坐待數月之理是以將兩路情形悉心核議爲此並進合攻之計冀收剋期采入之功

公又奏言

臣

克復小金川後探知金川賊人業已

嚴爲防備因思此地情形不能專用力攻必須仍兼計取前因功噶爾拉當噶爾拉等處旣無可進之理而各處道路形勢尙未探知胸中實無成竹

嗣雖訪得谷噶凱立葉二處而究竟孰爲妥捷亦  
不得不再三確訪且事關機要多有未可顯然辦  
理者又不得不輾轉設法稍需時日其未經安插  
之投番爲數衆多又須陸續分起管押赴各土司  
地方不令其稍有滋事至各路糧站進兵之始酌  
量仍由底木達一帶輓輸及進兵之後擬從楸砥  
運往腳價旣多節省而糧路亦易於照料但該處  
道路尙俟開修此時又不便遽修以致賊人知覺  
又須限定日期屆時趕辦且卽日進攻亦必照前  
抽調兵丁晝伏夜行不令舉火密速遄行糧運斷

不能赶上前已飭令多備乾糧以資裹帶而麪斤  
尙未趕辦齊全實無一事不須再四講求親身經  
理且昨據豐昇額札稱該處亦須等候楚兵而楚  
兵十二月初七日始自省起程計至丹壩須在歲  
底又准明亮咨送摺稿稱巴旺布拉克底現派頭  
人前往偵探間道亦俟回日稟明方能得辦查賊  
衆本屬無多不過在伊境內就近抽調往來支應  
總是大兵攻打何處緊急卽抽他處賊兵前往抵  
禦是以必俟各路辦理齊備同日會攻至美諾一  
帶不擬設兵駐守原非萬全之策實因臣等旣已

移兵谷噶而明亮等復從馬柰馬爾邦進取中間  
相隔至有五百餘里若當噶爾拉功噶爾拉俱派  
官兵往綴計必各需兵四五千卽僅畱守山口亦  
非各有兵三千不可況功噶爾拉旣已畱兵牽綴  
則美諾爲各路總滙之地亦必有兵聯絡其美卧  
溝亦如之是已去一萬數千而自大板昭瑪爾當  
以及由谷噶前進又須酌量畱防則攻勦之兵所  
存不過萬餘至如南路議改於河南河北進攻昨  
准明亮札稱卽欲盡出當噶爾拉之兵臣告以此  
時議於當噶爾拉牽綴者不過爲暫時之計使賊

人注意於此而漢土官兵轉從河南河北分襲馬  
柰馬爾邦及博多等處一經搶獲仍將當噶爾拉  
官兵或撤歸博堵或撤歸馬柰馬爾邦並非久於  
駐守若使常駐當噶爾拉亦必須數千人而東起  
科多南至章谷所畱兵衆又去數千則於河南河  
北分進之局亦不能辦况橫亘五百餘里皆駐防  
兵卽皆安臺站而自桃關至美諾一帶臺站更不  
能捲撤人夫官役又添數倍所糜帑項實多臣曰  
夜圖維不敢瞻徇衆論是以酌派三千人駐守鄂  
克什其餘各處竟不設兵不惟省兵且多省臺站

人夫之用况將來達木巴宗日隆存糧運竣運道  
改由楸砥則後已在校磨境內南路以章谷爲路  
亦在明正境內均距內地甚近卽酌畱策應之兵  
亦不至於疎失而在金川之小金川番人合計婦  
女老稚不過千餘斷不能出而復據舊巢汗牛一  
處已經明正土司派出頭人帶兵去彼彈壓金將  
其大頭人等眷屬攜往打箭爐約束所有精壯番  
人盡挑赴明亮軍營自必無從引誘查美諾係  
兩次攻克之地苟非萬不得已安肯棄而不守實  
因如此籌辦多省一後路之兵卽可多一進剿之



兵而一路既有可進之勢卽各路皆有可進之機  
殫心畢力聚於一處或可望奏功誠如

聖諭不入虎穴不得虎子是以爲此併兵直進之計恭請  
聖明訓示原不能處處周妥今仰荷

指示美諾一帶仍派大員設兵駐守謹將西起科多美諾  
東至喀爾薩爾所有應須防守兵數繪圖貼說恭  
呈

御覽臣卽飭令畱守後路之成果常青王進泰遵辦均奏  
入

諭曰阿桂回奏各摺其籌辦谷噶等處進兵情形一摺請

令豐昇額卽帶兵往攻凱立葉佔住山梁則賊人不能  
潛行翻山堵截谷噶後路等語此計甚是必應如此辦  
理著傳諭豐昇額移兵前往凱立葉佔據山梁方妥至  
谷噶一路阿桂旣以爲正路親自往剿仍當將所有之  
兵分起派員帶領以次而進我兵源源接濟聲勢益盛  
賊衆自必望而生畏至豐昇額所帶兵五千亦當仍遵  
前旨令五岱爲前起先進豐昇額在後繼進尤覺得力  
所有丹壩原駐之兵仍令五福帶領在彼駐守已足資  
防截其官達色所帶之兵則隨豐昇額往剿凱立葉於  
彼處畱防後路亦爲有益至閱擬畱兵駐守之圖其在

美諾偏北如拉布寨帛噶爾角克礪一帶皆兩金川相連之境居多又爲谷噶進兵後路自應畱兵防守若美諾東南之阿爾圖德木達策卜丹沙木拉爾資等處距賊境甚遠且其地尙在美諾營盤之後賊斷不能越過滋事此一帶防兵已屬虛設况兵力聚之則見其多分之易形其少今此四處之兵多者一二百少者五十若遇勦禦之時未必得力徒令我兵以分見少亦爲非計又何如省此四百五十餘兵益於功噶當噶湊用爲得實濟乎此圖想係阿桂未奉功噶當噶分攻諭旨時所定故爾節節籌備若當噶功噶既有牽掣之兵則各隘

防守又當隨宜酌定著阿桂再行妥酌遇便另爲繪圖  
貼說具奏